

Naalakkersuisunut apeqqut:

Anguteqatiminnik arnaqatiminnillu atoqateqartartut inatsisitigut periarfissaasasuaassuseqatiminnik atoqateqarneq ajortutulli ilersinnissaat qulakkeerniarlugu Naalakkersuisut suliniutit suut aallartinniarpaat?

(Inatsisartunut ilaasortaq Justus Hansen, Demokraatit)

Akissuteqaat

(Naalakkersuisut siulittaasuat)

Inatsisartunut ilaasortap Justus Hansenip inuiaqatigiinnut tunngasumik pingaarutilimmik saqqummiineranut Naalakkersuisut qutsavigaat. Isummat Justus Hansenip apeqquteqarnerminut tunngavilersuutigisai Naalakkersuisut tunngaviatigut isumaqatigaat.

Aallarniutigalugu Naalakkersuisut erseqqissaatigissavaat suaiaassuseqatiminnik atoqateqartartut suaiaassuseqatiminnillu atoqateqartannigitsut akornanni inatsimmi aallaavittut naligiissitsisoqarmat. Pineqartulli ilaanni assigiinnigissuteqartoqarpoq pineqartullu ilaanni immik-kut inatsiseqarluni suaiaassuseqatiminnik atoqateqartartut assigiinnigissinneqarnissaannut illersuiffiusussanik.

Tassunga atatillugu makku taaneqarsinnaapput:

Pisortanit akuerisamik suaiaassuseqatigiittut aappariittarneq: Suaiaassuseqatiminnik atoqateqartartut katittarneq pillugu inatsit malillugu katitinneqarsinnaanngillat pisortaniilli akuerisamik suaiaassuseqatigiittut aappariilersinnaallutik (pisortanit akuerisamik suaiaassuseqatigiittut aappariittarneq pillugu inatsisip atuutilersinneqarnera pillugu peqqussut nr. 320, 26. april 1996-imeersoq). Pisortanit akuerisamik suaiaassuseqatigiittut aappariittarneq aappariinnertulli inatsisitigut atuuffeqarpoq, taamaattorli meerarsiartaarnermut tunngatillugu pinnani.

Oqaluffimmi katittarneq: Maanna oqaluffimmi katititsisoqarsinnaanngilaq pisortaniilli akuerisamik suaiaassuseqatigiittut aappariinneq oqaluffimmi pilluaqquneqarsinnaavoq. Pissusilersuutit (Ritualit) naligiissinneqassanersut ilagiit (oqaluffiup) aalajangissavai.

Meerarsiartaartarneq: Meerarsiartaartarneq pillugu inatsit (meerarsiartaartarneq pillugu inatsisip Kalaallit Nunaannut atuutilersinneqarnera pillugu kunngip peqqussutaa nr. 63, 26. februar 2010-meersoq) aappariit meerarsiartaatigiinnissaannut taamaallaat periarfissiiffiuvoq.

Pinerluttulerinermi inatsit: Pinerluttulerinermi inatsimmi § 100-mi ilaatigut atoqateqartarneq pissutigalugu assigiinnigissitsineq pineqaatissiissutigineqarsinnaavoq.

Naligiissitaaneq: Naligiissitaaneq pillugu inatsit (Arnat angutillu naligiissitaanissaat pillugu Inatsisartut inatsisaat nr. 7, 11. april 2003-meersoq, kiisalu Naligiissitaanissamut Siunnersuisoqatigiit pillugit Inatsisartut inatsisaat nr. 5, 20 maj 1998-imeersoq) suaassuseqatigiit akornanni naligiissitsinermut tunngapput. Apeqquteqartup eqqaasaatut naligiissitaanissamut siunnersuisoqatigiinnut suliassarititaasut atoqateqartarnermut tunngatillugu naligiissitsinissamik aamma ilallugit allanngortinneqarnissaat isumaliutigineqarsinnaavoq.

Suliffeqarneq: Atoqateqartarneq pissutigalugu suliffeqarnermi assigiinngisitsinermut illersuifiusumik Danmarkimisulli inatsiseqanngilaq - soorlu assersuutigalugu kinguaassiutitigut suliffeqarfinni paasissutissiineq. Taamatulli assigiinngisitsinermut isumaqatigiissutitigut aalajangersagaqarsinnaavoq atoqateqartarnerlu piinnarlugu soraarsitsineq atorfinitsitsinermi malittarisassat naapertorlugit.

Kiisalu taaneqassaaq europami inuit pisinnaatitaaffii pillugit isumaqatigiissutip nassatarimagu ilaatigut atoqateqartarneq tunuliaqutaralugu assigiinngisitsinerup inerteqqutigineqarnera.

Taamaattumik pineqartuni assigiinngeqisuni inatsiseqarpoq suaassuseqatiminnik atoqateqartartut inatsisitigut periarfissaasa suaassuseqatiminnik atoqateqartanngitsunit allaanerunerannik nassataqartunik, imaluunniit suaassuseqatiminnik atoqateqartartut illersorneqarnissaannik siunertaqartunik.

Naalakkersuisut isumaqarput inatsisit taakku nalinginnaasumik misissorneqartariaqartut tamannalu suliniutigissallugu. Inatsisit ilaat naalagaaffimmi inatsisaammata naalagaaffimmi oqartussaasut akuliutsinneqassapput.

Inuiaqatigiit innuttamikkut assigiinngitsorpassuaqarfiusumik atoqateqartarnerlu pissutigalugu assigiinngisitsiviunngitsumik tunngaveqarnissaat Naalakkersuisut apeqquteqartutulli kissaatigaat. Inatsisit allaapput, aammali ilaqutariit inuiaqatigiillu allatut atoqateqartartunik akuersilutillu ataqqinninnissaat taamatulli pingaaruteqartigaaq. Taamatut tunngaviusumik akuerinnittoqanngippat ataqqinnittoqanngippallu inatsisit iluaqutaavallaarnavianngillat.